

QUESTION DE CHIRURGIE.

Pour estre disputee en l'estude de Monsieur le Vasseur Docteur en la faculté de Médecine, & Lecteur ordinaire en Chirurgie.

Est il necessaire de connoistre les os pour la guerison des playes?

I.

En toutes les maladies, dont la Chirurgie s'attribue la guerison, les playes tiennent le premier rang. Ce sont des maladies communes, tant aux parties simples que composees & ayans vne action parfaite. Leurs noms s'expriment diuersement pour la diuersité des parties: si elles se rencontrent dans les dures & solides, on les appelle Brisures, où de ce mot emprunté Fractures, si dans les molles elles retiennent le nom du genre & sont appelez playes, & pour parler en terme de l'eschole solutions de continuité, fraiches, recentes & sanglantes, exemptes de pouriture & de corruption, & dont les causes sont exterieures, euidentes, fortuites, & violentes; le Chirurgien en doit connoistre la nature & les differences; il doit pour se conseruer l'honneur prononcer la seureté ou le peril, la longueur ou la briueté de leur guerison: & pour y paruenir, outre la connoissance qu'il a de la matiere, de la figure, de la grandeur & des forces, de toutes leurs causes, il faut qu'il sçache l'essence & la grandeur de la maladie, la substance & l'usage de la partie blesee, les symptomes & accidents qui y suruiennent, ce qu'il ne peut obtenir sans la connoissance des os.

I I.

Est quelque chose à vn Chirurgien de sçauoir les causes des playes: de bien distinguer dans les playes les moistures, les coupeures, les piquures & meurtrissures, les playes simples d'avec les composees, les grandes d'avec les petites, les courtes d'avec les longues, les larges d'avec les estroites, les profondes d'avec les superficielles, & les droites d'avec les obliques & les rondes; que la grâde playe menace souuent d'un grand peril, où la partie son action estant abolie, ou le tout, en luy ostant la vie, que les parties les plus nobles apportent plus de crainte & de frayeur que les moins nobles; entre les moins nobles, que celles qui sont en perpetuel mouuement en donent plus que les immobiles; les spermatiques que les sanguines; les testes & les fins des muscles plus que leur ventre; les iointures plus que le milieu du membre, & les grands vaisseaux plus que les petits: c'est peu toutes fois sans la connoissance des os. Il est impossible de iuger de l'essence & de la grandeur des playes, sans connoistre les lieux où elles se font: qui n'a conneu les os ne pourra connoistre si vn cartilage, vn tendon, le commencement, la fin ou le milieu du muscle est coupé; comment il faut ouuoir & dilater vne playe estroite en la superficie, où il y a crainte qu'elle ne se rejoigne auparauant que la partie profonde. Il ne pourra cōseruer la figure du membre: il s'espouuentera des playes de la premiere table aux os de la teste, ignorant qu'ils sont double la plus part: il ne pèsera que la dure mere compait le pericrane estant coupé pour en estre vne production, d'ot la sortie n'est que par les sutures, il prendra les sutures pour des fentes & felleures; il croira que tous trous naturels dans les os sont des piquures, les aspretez des enfonceures, les lieux mal vnis & polis luy estant inconnus. Il aura ouy parler que les playes des iointures sont malignes & d'agereuses, il n'en fera nulle distinction puis qu'il n'en connoist pas les articulations. Qui luy apprendra qu'on ne doit appliquer des suppuratifs aux contusions ouuertes s'il n'a sçu la nature de l'os, & que tout humide luy est contraire: Qui ignore les os ne sçait en quoy differēt les parties molles d'avec les dures, les os des enfans, d'avec les os des hommes, qui vne fois coupez iamais ne s'augmentent, ne se rengendrent n'y ne se reioignent, sçaura il qu'il y a grād danger de veilles, de conuulsions & de douleur, où se rencontrent des tendons, des nerfs & où les lieux sont vuides de chair & osseux, & le moy en de conseruer l'action du membre pour ignotē leur situation dependante des os.

I I I.

Rien ne conduit mieux le Chirurgien à la connoissance de la nature des playes, de leur presages & de leurs remedes que les os, ils sont comme les fondemēs, les plus dures & les plus terrestres partie du corps, faits de la semēce, tenās lieu entre les premieres parties qui s'engēdrent, & entre les dernieres qui se perfectionnent, nourries de la moelle, non insensibles pour n'estre en perpetuelle douleur, mais capable de sentiment comme toutes les autres parties faites & engendrees de la semēce. Ils sont cause en quelque façō des playes; ils sont aussi necessaires pour y bien remedier. Il en faut sçauoir les conditions, leur nature, leur conformation, leur situation, leur figure, leur quantité, leur connexion, leur apophyses & leurs epiphyes, toutes les parties du corps naissent, croissent, s'establissent & s'affermissent dessus les os: elles empruntent d'eux leur figures & dispositions naturelles. Peut on connoistre la situation & connexion des visceres, la diuision des veines, les destours des arteres, & la distribution des nerfs ignorant les os: peut on iuger des muscles, de leurs origines & insertions, sans au prealable auoir vne entiere connoissance des os? Les quels ils sont coucheez? Peut on sçauoir que les fibres suivent la longueur des muscles, & les muscles la longueur des os sans les connoistre, toutes les choses sont le suit des playes, sans les os on n'en peut connoistre leur nature, & par consequent y remedier.

Il est donc necessaire de connoistre les os pour la guerison des playes.

F.M.P.
BIBLIOTHEQUE

A ces presentes Theses respondra publiquement (Dieu aydant) Leonard Dollé Parisien, Abbt des Escoliers estudiant en Chirurgie, le Dimanche troisieme Mars 1641. à vne heure precise dans les petites rues du Cloistre S. Mederie, à l'enſeigne de la ville de Rouen.